

EPISTOLÆ DVÆ

INSIGNES,

ALTERA D. STANISLAI

HOSII, CARDINALIS

Varmien. ad Illustriss. Brunf-
uici Ducem Henricum.

ALTERA MARTINI CRO-

meri, ad Sereniss. Regem, Proceres,

Equitēsque Polonos, in Comitiiis

Varshaviens. congregatos.



BIBLIOTECA NAZ.
ROMA
VITTORIO EMANUEL

PARISIIS,

Apud Sebastianum Niuellium, via Iacobæ,
sub Ciconiis.

M. D. LXIII.



AND

THE

OF

THE

THE

THE

THE

THE



THE

THE

THE

2

I L L V S T I S S I M E
P R I N C E P S , E T
D O M I N E .

Dedit ad me non ita pri-
dem Augustâ literas
Dominus Ludolphus
Haluerius Illustratis
vestræ Vicecâcellarius,
quibus perhumaniter
illius verbis me salutavit, simul à me pe-
tuit, vt in quo statures hîc versentur, Il-
lustrati vestræ perscriberem. Quod
ego tantò maiore cum alacritate facien-
dum esse mihi putavi, quâtò plures cau-
sæ sût, quibus Illustrati vestræ me plu-
rimùm esse deuinctum profiteor. Inter
quas est illa quidem minimè vulgaris,
quòd cum sororem Serenissimî Regis
mei, sibi matrimonio iunctam habeat,
non possum illam hoc nomine non plu-
rimùm obseruare. Sed est alia maior
etiam, quòd cum inter eos vitam degat,
qui doctrinis varijs & peregrinis abdu-
cti, in aliud nescio quod Euangelium se
transferri passi sunt, constanter nihilo-

minùs in eo permanet Illustritas vestra,
 quod à puero didicit, & se verè Catho-
 licum & Orthodoxum Principem esse
 declarat. Quo nomine meritò colitur à
 pijs omnibus, & in oculis fertur. Ego
 verò quanti faciam hanc illius in fide
 Catholica constantiam, quanta in illam
 vel propter vnā hanc causam meæ vo-
 luntatis inclinatione propendeam, nulla
 satis oratione consequi possum. Itaque
 non solum in hoc vulgari admodum
 officij genere lubens Illustritati vestræ
 gratificabor, verum etiam si quod esse
 possit aliud obsequij, & seruitutis genus
 quo magis animum erga illam meum
 testatū Illustritati vestræ facere possim,
 hoc certò de me sibi persuadeat, quòd
 nullum in me addictissimi seruitoris of-
 ficiū requiri vnquam patiar. Quam-
 obrem de statu concilij quod hoc tem-
 pore scribam aliud non est, quàm aper-
 tum id esse XV. Calen. Februarij, quòd
 Ecclesiæ suæ foelix, faustum & fortuna-
 tum Deus esse velit, & habitam esse pri-
 mam sessionem ad iij. Calen. Martij:
 Alteri sessioni diem esse dictam, xvij.

Calen. Iunij. Quot verò hîc Oratores
 adsint & Episcopi, è schedâ præsentibus
 inclusa Illustritas vestra cognoscet. Ac
 adferebantur huc gratissimi nobis rû-
 mores, etiâ Illustrissimos Principes Ele-
 ctiores Saxoniae & Bradeburgensem, hûc
 suos citò missuros, quibus vehementer
 fuimus exhilarati, nisi quòd ea de re
 certi nihil adhuc habemus. Deû autem
 precamur, vt & horum, & aliorum Prin-
 cipum mentes in hanc voluntatem im-
 pellat, quòd suos Oratores mittere ne re-
 cusent, cùm causam recusandi nullam
 habeant. Nec enim aliud nos cupimus
 vehementiùs, nec aliam ob rem tam fre-
 quentes in hanc Germaniae ciuitatem
 conuenimus, quàm vt quod infirmum
 est consolidare, quod ægrotum sanare,
 quod confractum alligare, quod abie-
 ctum reducere, quod perierat quærere
 possimus: non cum austeritate imperan-
 do, & potentia, sed in spiritu lenitatis
 omnes qui voluerint instruendo, quò
 cognoscât, nihil à nobis præter salutem
 ipsorum quæsitum esse. Quem suæ dis-
 cessionis à nobis fructum tulerint, non

sine magno suo periculo multi iam in
 Germania didicerunt. Nam vt reliquas
 calamitates taceam, quibus per hos an-
 nos quadraginta grauitè afflicta fuit no-
 bilissima hæc prouincia, quo authore
 primùm ab Ecclesia Dei discessio facta
 est, is quemadmodum ipse Christum di-
 uidere conatus est, sic & ipsum à suis
 quotidiana concisione diuidi videmus,
 vt vbiq̃ue doctrina ipsius recepta est,
 ibi tot fides, quot voluntates, tot esse do-
 ctrinas, quot mores cernere liceat. Et
 quemadmodum præclarus quidam Eccle-
 siæ doctor scripsit posteaquàm ita fides
 scribi cœptæ sunt, vti volumus, aut ita
 vti volumus intelligi, tandem eò res re-
 ducta est, vt vbi excessum est ab ea fide,
 quæ sola est, dum plures fiunt, ad id cœ-
 perint esse, ne vlla sit. Quod etiam
 ipsimet quæruntur non vno loco, qui
 segregauerunt semetipsos, ad atheismum
 tandem apud plerosque ventum esse.
 Vidimus hic Ducum Vinaricnsium li-
 brum, quo nouem, vidimus alium mini-
 strorum Mansfeldensium, quo sectæ sunt
 vndecim condemnatæ, quæ ferè omnes

non aliundè, quàm à Luthero duxerunt originem. Ex his duobus libris cognouimus, Ienenses & Mansfeldenses ministros, non magis à nobis Christianis, quos per contumeliam, vt ipsis videtur, Papistas vocant, abhorrère, quàm à Vvitembergenfibus & Lipfenfibus, quibus vifum est in certis doctrinæ Christianæ capitibus, ab ipsis etiam Lutheri placitis nō leuiter diffidere: nec illius sententiæ, quæ non alio loco, quàm quo Dei verbum à multis habetur, in omnibus fubfcribere. An autem non præstaret, si qua secta condemnanda est, vt id publicè totius orbis decreto fieret potiùs, quàm in aliquo Saxoniz angulo? Certè quod Catholicum esse debet, de eo nihil nisi in Ecclesia Catholica, quam Concilium Oecumenicum representat, statuere fas est: alioqui Catholicum dici non poterit. Non est Vvitembergensis fides nostra, sed neq; Vvitébergēfis, neque Ienensis, neque Tygurina, neque Geneuenfis: sed est & vocatur Catholica fides, nusquā vt aliquid statuere de ea liceat, nisi in eo Concilio, quod propterea vo-

catur Oecumenicum, quòd ex vniuerso orbe Christiano conuocantur ad id omnes, quotquot se Christianos esse profitètur, vt quod omnes tangit, ab omnibus approbetur. Vidimus & Flacci, & Galli, & Amstdorffij, & Vvigãdi, & Heshusij, & Matthæi cuiusdam iniquissimè ceditiosissimique iudicis, (qui sceptro magistratus pòtiùs coërcendus, quam stylo refutandus esset) conuicia & maledicta: quibus grauißimis afficiunt non ministros tantùm, verùm & Principes Electores omnes, quamuis suppressis eorù nominibus: nec minùs illos, quàm nos, pro condemnatis habent, & eorum communione consuetudinèque suis interdunt. Legimus & Philippi Melanchthonis, (qui miser cùm ei Lutherus in plerisque non satisfaceret, iuit de virtute in virtutè, & ex Lutherano factus est ad extremum Calvinianus), graues quærimonias de hoc mirabilium hominum genere, qui suo arbitrato damnant quidlibet, neque personis auditis, neque rebus diiudicatis, cum quibus nihil agi posse dicit, Cogunt, inquit, Concilia, quando

AD DVCEM HEN. BRVN. 5
& vbi ipsis placet, atque vendicant sibi
maiores, magis intolerabilem, & mi-
nùs excusabilem auctoritatem ac pote-
statem, quàm Papa Romanus vnquàm.
Quæ quò tandem euasura videantur,
cogitetur, inquit. Paulò antè verò scri-
bit, quòd in anarchiã euaserint. An au-
tem id verum sit, scire melius possunt,
quorum res oculis est subiecta. Quan-
quàm & ego mihi videor animaduertis-
se quibusdam in locis, vbi suaue Christi
iugum per ministrum suum Pontificem
Ecclesiam gubernãtis excussum est, etiã
Principum iugum non ferè tolerari. Vi-
dimus & Clebitij quendam libellum,
qui inscribitur, Victoria veritatis & rui-
na Papatus Saxonici, cõtra Heshusium
scriptum, in quo Lutheranos ad syno-
dum, & ad disputationem de præsentia
vel absentia potiùs, vt ille sentit, Christi
corporis & sanguinis in Eucharistiæ Sa-
cramento prouocat, ac easdem illis leges
præscribit, quas ipsi nobis Christianis
præscribere cõsueuerunt. Quorsum au-
tem res redijt per Deum immortalem?
Putauit Lutherus euersurú se Papatum

Romanum, qui mille quingentis annis in Ecclesia Dei duravit, duraturus etiam iuxta Christi promissum, ad finem vsq; seculi: ecce autem ipsius Lutheri Papatum, quem vixdum annos quadraginta durasse constat in Saxonia, saluo Romano, iam euersum prius esse non temerè Sacramentarij gloriantur, cū bona pars eorum, qui Lutheri fidē fuerāt amplexi, reiecta ea, Zuinglij siue Caluini doctrinam sit sequuta: Ac plurimos in Germania videre liceat, qui de præsentia Christi corporis in Eucharistia non solum ab Ecclesia Dei, verum ab ipsius etiam Lutheri placitis discesserunt: multoq; nunc latius Caluini doctrinam propagatam videre licet, quàm fuit vnquam Lutherana. Quo libentiùs adduci deberent hi qui dici volunt Cōfessionis Augustanæ, vt quibus de rebus inter se disceptant, de his iudicium penes hoc Oecumenicum Concilium esse vellent. Et habituri hīc essent æquiores iudices opinionione sua. Vidimus Flacci supplicatorios quosdam libellos, quibus instat & vrget mirabiliter, vt in Germania, vel

potiùs in Saxonia Synodus congregetur: à qua tamen arceri vult primū Christianos omnes, quos illi visum est vocare Papistas, deinde Seruetianos, Suenckfeldianos, Antinomos, Anabaptistas, & Osiandrinos: neq; sibi cum alijs quàm cum Synergistis, Maioristis, & Adia-phoristis rem esse vult, ac miras tragœdias excitat de Confessione Augustana, quam esse multis mutatam ac deprauatam quiritatur: neq; dubitat alicubi falsi crimen impingere Philippo, quòd non magis Confessionem Augustanam, quàm ipsos etiam Lutheri libros plurimis in locis adulterauerit. Nec id sine causa. *Mutata Confessio Augustana ab ipso Melancthone.*

Nam cõtuli ego quoque aliquot exemplaria Confessionis Augustanæ, & ita se rem habere comperi: Nec vlla mihi visa est propiùs accedere ad eam, quæ fuit Augustæ oblata Christianissimo Imperatori Carolo, cuius memoria in benedictione est, quam ea, quæ Flacci opera Ienæ typis est excussa, & extat in librorum Lutheri tomo quarto. Cũ itaque de confessionis etiam ipsius Augustanæ fide inter istos disceptetur, quam

toties mutatam & deprauatam esse non .
 modò Zuingliani siue Calviniani, ve-
 rùm & ipsi vociferantur veri Lutherani,
 qui cothurnum quendam eam appellāt,
 vtrique pedi aptum, cū author ipse,
 qui suis conscripsit manibus, & in alis
 multis, & in eo, quod præcipuum est
 Christianæ doctrinæ caput, de præsentia
 Christi corporis & sanguinis in Eucha-
 ristia, non ab Ecclesia modò, verum & à
 seipso, & à magistro suo Luthero diuer-
 sum sentiat, & cum Caluino consentiat,
 nōne satius foret, vt de hac ipsa Cōfes-
 sione, quid in ea rectè recipi posset, quod
 non, huic Oecumenico potius Concilio
 iudicandi potestatem isti permetterent,
 eisque se subijcerent, quàm vt vnus ho-
 minis arbitrio toties mutata tantam ip-
 sis etiam Lutheranis de ea disceptandi &
 altercādi materiam præberet? Mihi verò
 si cuiusquam alterius, certè Lutheranae
 sectæ vel maximè videtur interessē, do-
 ctrinam vt suam siue Cōfessionem huic
 Oecumenico Concilio diiudicandam
 permittat: quandoquidem non solūm
 per Sacramentarios ea nonnullis locis

vehementer oppugnatur, ac propemodum expugnatur, verumetiam ipsorum Lutheranorum inter se mutuis dissidijs extinguitur. Cuperet Flaccus hoc iudicium in Saxonia fieri: cur autem non ibi potius, vbi totus cōgregatur orbis Christianus? Scilicet, Saxonica fides condenda, & non Catholica potius nobis est retinēda. Certè magis ex vsu, magis etiam ex dignitate foret Principum istorum, vt controuersias istas ministrorum suorum, eorum iudicio potius disceptandas permetterent, quos pro legitimis iudicijs agnoscunt, & Dominus eorum Cæsarea Maiestas, & quotquot sunt alij per orbē vniuersum Christiani & orthodoxi Reges & Principes, quàm vt vel Flacco se, vel Gallo, vel qui sunt eiusdem farinae, submitterēt. Neq; dubitare debēt, quin Patres hos multò essent æquiores habituri, quàm illos nescio quos. Essēt hīc nō magis cognoscēdi, quàm ignoscendi locus, idque tolerabilioribus conditionibus, quàm quas præceptoribus suis proponit Flaccus. Et cū in Symbolo profiteamur omnes, credere nos sanctā

EPIST. CARD. HOSII

Ecclesiam Catholicā, nōne magis velle
 deberent Catholicam confessionem ha-
 bere Principes isti, quā vel Saxonica,
 vel Augustanam, vel nescio quam aliā?
 Iam enim non modò prouinciæ, verū
 & ciuitates ferè singulæ, proprias & pri-
 uatas suas confessiones adferunt. Qua de
 re vbi statui potest melius, quā in hoc
 Oecumenico, quod Catholicā Ecclesiā
 representat, Concilio? Quamobrē quod
 sua sponte facturam Illustritatem ve-
 stram non dubito, maiorem in modum
 ab illa peto, vt instare velit apud Prin-
 cipes istos Germaniæ, & eis persuadere,
 quos presertim habet aliqua sibi propin-
 quitate, familiaritatēque coniunctos, vt
 suos huc Oratores primo quoque tem-
 pore mittant. Audio quod non ita pri-
 dem Illustrissimi Domini Marchionis
 Brandeburgen. Electoris filia nupsit
 Illustritatis vestræ filio, quod illi matrimo-
 nium foeliciter euenire cupio. Cū
 autem is non alienus ab Ecclesiā Catho-
 lica sit visus, promiserit etiam proximè
 superiori anno Nuntio Apostolico se
 suum huc Oratorē missurū, faciliè perfe-

erit apud illū Illustritas vestra, auctoritate sua, vt præstet, quod promisit. Scio non defuturos, qui dehortentur Illustritatem eius ne faciat, vel hanc solam ob causam, quòd à Pótifice Romano Concilium hoc est indictum, cuius iugum excussum ab omnibus cuperent: nec alia de re magis laborant, quàm vt nomen illius quàm maximè odiosum, & inuisum reddant omnibus, quòd sublato gubernatore, faciliùs circa Ecclesiæ naufragiū grassari se posse persuasum habent. Sed quis tandem est, qui posset, præter hunc, Occumenicum Concilium conuocare? Nihil iam de eo dicā, quòd semper hæc fuerit ecclesiastica regula, iam inde à mille trecentis & amplius annis, ne præter sententiam Romani Pontificis Concilium ullū celebrare liceret. Fingamus licere, vt alius quisquam indicet. Quis erit ille, qui possit hoc præstare? Nū Imperatoria Maiestas? Est quidē his Regū omnium & Principum excellētissimus, verū nec à Gallis, nec ab Hispanis, nec ab Anglis, nec à Polinis, nec à multis alijs eo loco habetur, vt ei tanquàm supe-

riori, dicto audientes esse velint, qui Regnorum horum, & aliorum, gubernacula tenent. Contrà verò, Pontifici Romano libenter hunc honorem habent, & ipsa maiestas Imperatoria, & omnes Reges & Principes, quotquot Catholici & Orthodoxi censerì volunt, ut eum tantquam superiorem agnoscant, & ei debitam reuerentiam & obedientiam præstent, atque ab eo vocati, vel ipsi veniant ad Concilium, vel saltem suos Oratores mittant. Quod iam à plerisque factum esse, ex ea, quâ Illustritati vestræ mitto, scheda cognoscat. Cùm itaque vel ipsa luce sit clariùs, quòd Oecumenicum Concilium nemo possit alius congregare præter Pontificem, cùm suos ad illud Oratores Imperatoria Maiestas iam ablegauerit, qui subiecti sunt illi Germaniæ Principes, cur id facere detrectent, quod ab Imperatore & domino suo factum iam esse vident? Nihil honori suo detrahi persuasum habet Maiestas Imperatoria, quin aliqua potius illum accessione cumulati credit, si gloriam hanc Deo det, ut quem illi visum est suum in

terris

terris Vicarium constituere, debitam ei
 reuerentiam tribuat. Et certè nulla res
 est, in qua piorum Principum vel fides
 magis exerceatur, vel Christiana quædã
 humilitas, qua nihil Deo gratius est, cla-
 riùs enitescat, quàm cùm nō hoc ab illis
 attenditur, quis ille sit quem in Petri
 Cathedra Deus collocauit, cū fieri quã-
 doque possit, vt eadem qua cæteri præ-
 ditus infirmitate, nec vitæ prorsus in-
 culpatæ, nec omnibus his rebus, quibus
 libentius homines honorem quendam
 & venerationem tribuūt, sit satis instru-
 ctus: verùm id solùm spectatur, quòd
 Christi Vicarius, quòd Petri legitimus
 successor est: vt honor omnis nō ad ho-
 minem, qui & infirmus est, & suis ipse
 persæpè vitijs nō caret, verùm ad ipsum
 Deum referatur, per quē in ista Cathe-
 dra collocatus est. Nec in homine fidu-
 ciæ quicquam ponitur, quod qui facit,
 cum Propheta maledictū esse dicit, sed
 in solo Domino, qui potest per quamli-
 bet indignum peccatorem contra spem
 etiam, & expectationem multorum, ea
 præstare, quæ maximum ipsius Ecclesiæ

fructum adferre queant: quò sic perspicuum fiat omnibus, non id hominis virtute contigisse, verùm excelsi dextra factum esse. Quam itaque Deo gloriam dat Imperatoria Maiestas, & eius exemplo cæteri Reges & Principes Christiani, cùm eandem gloriam Deo non dent, etiam subiecti Maiestati illius Germaniæ Principes, vt ipsum per ministrum suum Pontificem ad Concilium eos vocanti pareant, & suos huc Oratores primo quoque tempore mittant? Dicant illi quicquid volêt, vnus vt Ecclesiæ præsit necesse est, si debet vnitas in ea retineri. Et quàm verum sit illud, quòd non aliùde schismata & hereses obortæ sunt, quàm inde, quòd sacerdoti Dei non obtemperatur, dum Episcopus, qui vnus est, & Ecclesiæ præest, superba quorundam præsumptione contemnitur, & homo dignatione Dei honoratus, ab indignis hominibus iudicatur, non iam in Cypriani tantùm libris legimus, verùm etiã in his quæ facta sunt in Germania, oculis ipsi nostris cernimus. Excussisse quidam sibi videntur iugum Pontificis

AD DVCEM HEN. BRVN. IO
quid autem ex eo cōsequutum est? Tot
fides, quot voluntates: & pro vno Papa,
multos iam esse nacti videtur. Nolo iam
dicere de his, qui Caluini verbum pro
Dei verbo sunt amplexi, quemadmodū
hi querantur de illis, qui Lutheri potius,
quā Caluini verbū tanquā Dei ver-
bum adorare malunt, quōd non sustule-
rint, verū ad se pertraxerint Papæ ty-
rannidem, prōque ligneo iugo Papæ
collo excusso, ferreum ab illis imposi-
tum sit? Nihil itaque dicā de Sacramen-
tariis, quibus nihil est impurius: an au-
tem ad eundem modum de se mutuo nō
queruntur Lutherani? Quā grauiter
ferat Philippus, quōd maiore magisque
intollerabilem & minū excusabilem
authoritatem ac potestatem, quā Papa
Romanus vnquam, sibi vendicent Flac-
cus & Gallus, paulò antè commemora-
ui. Nunc audiat Illustritas vestra, quid
vicissim de Philippo præceptore suo,
quāuis suppresso illius nomine, scribat
Gallus. Libet autem ea lingua transcri-
bere, qua Galli libellus editus est.

Est verò id muneris & officij mei,

haud secùs atque illorum, vt veritati pa-
 trociner, & ei contradicentes reprehèn-
 dam, qualescùque demù sint illi, etiam si
 sit Angelus è cœlo. Adeóque persuasum
 habeo, hoc ipso plus me eis honoris &
 beneficij deferre corâ Deo, dũ illos cul-
 pito, suorum errorum admoneo, atque
 ad pœnitentiam eos inuito, quàm illos
 ipsos adulatores & palpones omnes, qui
 sua adulatione illos in erroribus confir-
 mant, atque in pœnitentia detinent. An
 verò persuasum habent eiusmodi se esse
 præceptores, vt ipforum dictis omnibus
 necesse sit fidem cōmodare discipulos?
 aut id genus Sanctos, qui errare non
 possint? Atqui sanè nec apud Ethnicos
 quidē nouum isthuc est, vt interim disci-
 pulo diuinitus veritas patefacta sit, at-
 que etiamnum patefieri possit præ illius
 præceptore, in qua etiam non dubitet à
 suo dissentire Magistro. Vnde illa nata
 est sententia, Amicus Plato, amicus So-
 crates, magis amica veritas. Atque ante
 illos quidam insigni præditi sanctimo-
 nia errauère, & in errorem alios induxê-
 re. Tum quoque necesse est Lutherum

itidem vt sinant adhuc esse præceptor-
rem, & præceptorum omniũ præcepto-
rem Christum, à quibus ipsi defecerunt,
quemadmodum in hoc omnis nostra
superior disputatio acquiescit : quibus
iplimet iam præceptoribus sese oppo-
nunt, planèque ingratos declarant pro
veritate manifestata. Pergunt interim,
mittuntque in errorem, & mittuntur,
idque sub præceptorum titulo, perinde
vt olim Iudæi sub legis, & Pótificij sub
Ecclesiæ titulo.

Atque illi lepidam hanc & seriam
collationem (à doctore, tenebat tantum-
modò) accipiant, qui sic dicere solitus
erat : estque sanè salutaris oratio, quam
operæprecium sit non ignorare modò
Christianos pro sui fida commonitione.
Quemadmodum Iudæi, ait, clamabant,
Templum Domini, Téplum Domini,
& Papistæ hætenus clamitarunt, & ne-
que dum clamitare desinunt, Ecclesia,
Ecclesia : ita nimirum etiam nostri iam
crepitât Magistri & Scolastici Vvitem-
bergenses : neque ex ipso fundaméto quic-
quam norunt aliud, nisi, Præceptores,

Præceptores. Interim præceptoris Christi, cui testimonium reddit deus, Hic est filius meus, ipsum audite: tum quoque præceptoris Lutheri, cui & scripta & opera testimonium afferunt, diuinitus illum ceu postremum vltimi temporis huius Eliam Ecclesiæ & doctrinæ reformandæ excitatum: horum, inquam, præceptorū tum Papistas, tum Adiaphoristas magna cœpit obliuio.

Huc etiā illud pertinet, quòd nos novos Pontifices siue Papas & Ecclesiæ reformatores criminantur. Atqui verò isthuc ipsum in illos equidem quadrare puto. Vt enim Romanus Pontifex id sibi arrogat, se errare nō posse, se esse vniuersalē totius Ecclesiæ Episcopū, quicquid ipse dicat & statuatur, id valere oportere, & mēra esse diuina oracula, de quibus nemini ambigere, nec cuiquam contradicere fas sit: idq; eò, quòd cathedræ Petri ipse hæres sit, aut esse velit: haud aliter profectò Vvittembergenses sese comparant, dum Lutheri & spiritus eius ex sede hæredes esse volunt: cuius tamen spiritus, vt iam cœptum est, tantundem

propemodùm apud illos residere videatur, quantum spiritus Petri Romæ apud Pontificem, Cardinales, Episcopos, & illorum gregem, &c.

Nec pauca eiusdē generis apud Flaccum & Amsdorfium reperire licet, nisi quòd omnia nunc in medium adferre, necesse non est. Hoc tantùm ostendere volui, posteaquē Papæ iugum excussum est in Germania, multos ibi natos esse Papas, & eos magis intollerabiles, si quid Philippo credimus, quàm fuit vllus vnquàm Papa Romanus. Inde sunt istæ sectæ tã inter se mirabiliter dissectæ, dum quisque se pro Papa gerit, dum quisque, quod ipse docet, id tanquàm Dei verbum ab omnibus adorari vult, vt iam tot habere Germania Deos videatur, quot habet nouæ doctrinæ magistros, dum vniuscuiusque corū verbum, tanquam Dei verbum & Christi recipit Euangelium, (sic enim doctrinam suam appellari volunt.) Nec erit sectarum istarum finis vllus, nisi priùs cò redeatur, vnde discessum est. Incidi nuper in libellum quendam Ioannis Spangenbergij,

EPIST. CARD. HOSII
quem edidit anno proximo superiore,
cuius inscriptio hæc est:

Verax narratio beneficiorum per D. Martinum Lutherū pie memoriae, præsertim Germaniæ diuinitus præstitorum, & detestandæ ingratitude erga eiusmodi ingentia beneficia & munera, &c.

Inter alia Lutheri beneficia, numerat & hoc, quòd Antichristum reuelauerit. Quòd si nihil aliud fecisset, vel hoc solo nomine dignum cum fuisse scribit, cui summus honos haberetur. In fine verò libelli prophetias quasdā (sic enim vocat) ex libris Lutheri cōgerit, inter quas ponit & hanc de fructibus reuelati Antichristi.

Vetus verbum est, & à multis doctoribus repetitū, quòd post reuelationem Antichristi tam erūt homines feri, quòd iam deinceps nollent Deum agnoscere, nec vllam illius rationem habere: sed iuxta suam quisque voluntatem faciet, quicquid diabolus & caro suaferit. Hoc tempus iam impletum videmus. Posteaquàm enim admirabili quadam & sin-

gulari Dei gratia Antichristianismi, siue Papatus horrenda mendacia ac doli, deceptionesque manifestatae sunt, incipiunt iam homines nihil amplius credere: & posteaquàm à vinculis Papatus se liberos esse vident, volunt etiam esse liberi & soluti ab Euangelio, & à praeceptis Dei: & volunt vt deinceps rectum sit & iustum, quicquid vnique visum fuerit.

Obsecro diligenter Illustritas vestra secum expendat hæc verba. Nec enim verius fuit, quod Caiphas olim dixit, quàm quod nunc hic Pseudopropheta scribit. Quamuis enim falsò Papatum vocet Antichristianismum, cùm hic status, qui nunc est in multis Germaniæ locis, multò sit hoc nomine dignior, hoc tamè verissimum est, quòd posteaquàm Christi suaue iugum per Papam Ecclesiam suam gubernantis excussum, & ipsum Papam Antichristum esse falsò persuasum est plurimis, & Christi iugum simul est excussum, ac eo res redacta (proh dolor) quòd qui diruperunt vicula Papatus, iidem illi nec Euangelij, nec Dei

præceptorum vinculis vllis alligati iam esse volunt: ac diruptorum vinculorum fructum hunc ferunt, vt iam deinceps nihil credant, & faciat quisque, quod sibi videtur. Qua de re queritur etiã Hieronymus Menczelius, cuius libellum de pastoribus legi, eodem illo anno impressum Islebij, quam isti nouam Bethleem esse volunt, in qua nouus Christus natus sit, vel antichristus potiùs. In cuius libri præfatione sunt hæc verba:

Posteaquàm per sanctum Euāgelium à Papæ tyrannide, & potestate liberati sunt, & assueuerunt omnes illius constitutiones reiicere, progrediūtur vltcrius, & volunt prorsus eandem consuetudinem in aliis quoque rebus omnibus, siue sint bonæ, siue malæ, retinere. Volūt esse liberi, nec à quoquam prohiberi, quominùs arbitrato suo viuant, haud aliter, quàm si Euangelium esset talis doctrina, quæ vnique concedat potestatem faciendi, quod illi placet, quæ nullum ordinem, nec vllam disciplinam ferre possit. Quòd si quis eis resistere fuerit ausus, eò veniunt audaciæ, vt non solùm

odia suscipiant erga suos prædicatores, & eos contumeliis afficiât, verùm etiam pro virili sua tyrannicè persequantur.

Ac si quem volunt ordinem prædicatores constituere, statim vim esse dicunt minimè Christianam, & nouationem quandam, & introductionem veteris Papatus, per quam prædicatores propriam suam potestatem & dominationem in commissum sibi gregem stabilire velint. Qui si pergant vrgere executionem eorum quæ constituerunt, non solum conuiuiis afficiuntur, verùm etiam ad extremum expelluntur.

Neq; dissimilia queritur Heshusius in eo libello, quæ & ipse de pastoribus scripsit. Videt igitur Illustritas vestra, quo loco sit Germaniæ status, posteaquàm ea multis in locis Papæ iugum excussit: quod commutatum, non excussum esse videtur, cum alio cuiusvis potius, quàm Christi, multò grauiore iugo, prematur. Accusat autem Spägembergius in eo libello, ex quo paulò antè nonnulla produxi, non Christianos, quos ipse vocat Papiſtas, verùm illos ipsos accusat ingrati-

dinis, qui Lutheri verbū, tanquā Chri-
sti verbum quadraginta his & ampliū
annis adorarunt, Vvittembergenses po-
tissimū, Lipsenses, & qui sunt sub Du-
ce Vvirtembergensi. Hos igitur grauitē
accusat, quōd acceptorū a Luthero be-
neficiorum immemores, ausi fuerint in
decem aut vndecim doctrinæ capitibus
ab ipsius doctrina, quam purum putum
Dei verbum esse persuasum omnes ha-
bere cupit, discedere, quōdque his cum
elogiis ornauerint.

Vocant eum Philautū, id est, eiusmo-
di hominem, qui non nisi de se vno præ-
clarè senserit, sibi vni plurimum tribue-
rit: cuique nihil arriserit præterquā
quōd ipse dixisset & fecisset. Appellant
item Philonicum & Eristicum, id est,
hominem vsque ad eò rixosum, vt sem-
per suam tueatur sententiam tanquā
æquā, nemini quicquam concedere,
nulli cedere velit, suam dūtaxat aucupe-
tur gloriam, nec quenquam præter se
ferre sustineat. Itēque Doctorem Hy-
perbolicum, puta, qui ex culice possit
efficere camelum, qui mille iactitet, &

vix quinque cogitet: effutiat quicquid in buccam venerit, flocci pendens num vel verum, vel falsum sit quod dicit: denique qui duplo plus asserat, quàm ipsa habeat rei veritas. Nuncupant etiam illum Polypragmenicum, qui se procaciter, & petulanter negocijs omnibus immisceat, qui plura sibi expedienda sumat, quàm ipsius poscat prouincia, rebusque omnibus, quæ tamen nihil ad illum pertineant sese ingerat. Tum quoque ingenij ostentatorem eum nominant, qui nõ nisi ingenij acumen præter necessitatem ostentare, seseque venditare voluerit. Sed & Stoicum, durum capitonem, qui non nisi suo vixerit cerebro, atque alios tyrannica continuerit, & presserit seruitute. Denique Somniatorem eum vocant, & pro dolor miserandum in modum isthæc coquunt, atq; permiscet, &c.

Quòd si discipulorum Lutheri tale de Luthero fuit iudicium, & certum est, non deesse quosdam etiam Principes, qui Melanchthonis doctrinã sibi potiùs amplectendã esse putant, quàm Lutheri: ac rectè ab eo factum existimant, quod

non in omnibus cum Luthero confen-
 ferit, sed in quibusdam ad nos Christia-
 nos, in alijs verò nonnullis dogmatibus
 ad Zuinglianos, siue Caluīnianos defle-
 xerit, vel hæc ipsa res calcar addere pos-
 set Germaniæ Principibus, vt ne vel
 Melanchthonis, vel Spangenbergij, vel
 Illyrici iudicio de doctrinā Lutheri sta-
 re, sed eam Oecumenico potius Cōcilio
 disceptandam permittere vellent. Sic
 enim & dissidia, quæ sunt inter mini-
 stros eorum, tolli facilius, & ipsi Princi-
 pes ad agnitionem veritatis redire cele-
 riùs possent. Sic autem in eodem illo li-
 bello de Luthero scribit Spangember-
 gius, vt eū exæquare Christo videatur,
 nec alio ferè loco, quàm quo scripturas
 Canonicas, eius libros haberi velit. Ac-
 cusant nōs idololatriæ. Potestne autē ef-
 fe maior ac manifestior idololatria, q̃ sit
 hæc, vñus alicuius hominis verbum, in
 quo nec doctrina excellens, nec vlla est
 vitæ sanctimonia, tanquàm Dei verbum
 recipere, & corā illo incuruari, ac si quis
 ab eo discesserit, eum è cœtu suo eicere?
 Utinam vellent isti Principes memores

esse verborum, quibus in Prophetis & Apostolicis literis idola fugere monentur, & cùm intelligant, nihil aliud esse, quàm mera quædam idola, Lutherum, Philippum, Flaccum, Brentium, remis, quod aiunt, & velis illa fugerent, deque eo, quæ doctrina Verbum Dei censeri debeat, penes Ecclesiam Catholicam, quam Concilium Occumenicum repræsentat, iudiciũ esse mallent, quàm penes Flaccum, vel Brentium, vel nescio quos alios Saxonicos ministros. Etiam extra Saxoniam leguntur & intelliguntur scripturæ, & rectiùs ibi iudicari potest, qui sit germanus scripturæ sensus, vbi totus orbis conuenit in Christi nomine, quàm in paucorum conuenticulo. Quod Catholicum dogma cēferi debet, in Ecclesia Catholica debet approbari: quã frustra se credere in symbolo profiterentur, qui malūt vnius alicuius priuati hominis, aut etiam paucorum in angulo aliquo conuenientium, ac diuersum ab illa statuentium, quàm illius sententiam sequi. Sæpè iam periculum fecerunt, multa sunt inter eos colloquia, multa

sunt habita conuenticula. Quid autem
 aliud lucrifecerunt, quàm quòd magis
 ex illis incerti, quàm fuerant antea, dis-
 cesserunt, magis etiam inter se pugnan-
 tes? Huc itaque suos mittant potiùs Prin-
 cipes: hîc quæ doctrina cum verbo Dei
 consentiat, quæue cum illo pugnet: do-
 ceri velint. Nam sicut in ministrorum
 suorum cõuenticulis, siue, vt ipsi vocât,
 colloquiis iam experimento didicerunt,
 quòd miscuit Deus in medio eorum
 spiritum vertiginis, vt errare facerent
 Aegyptum in omni opere suo: ita præ-
 sentê hîc adesse Spiritus sancti gratiam
 cognoscent. Non erit hîc Deus ille dis-
 sensionis, qui regnat in his locis, vbi sua-
 ue Christi iugum, per ministrum suum
 Pontificem Ecclesiam gubernantis, ex-
 cussus est: sed erit Deus pacis & di-
 lectionis, qui faciet vtraque vnum, &
 per diuersitatem linguarum cunctarum,
 gentes in vnitatem fidei congregabit.
 Quod vt ita eueniat, supplices misericor-
 diam illius implorabimus. Hæc ego pro-
 pterea pluribus Illustritati vestræ scri-
 bēda putavi, vt si visum illi fuerit, com-
 municet

municet cū Illustrissimo Principe Do-
 mino Ioachimo Electore Brandebur-
 genſi, qui non alienus à nobis eſſe vide-
 tur: Quo nomine Illuſtritatem illius
 plurimū obſeruo: præcipuè cū & ip-
 ſe, ſereniſſimi Regis & Domini mei ſo-
 rorem in matrimonio habeat, quam cō-
 ſtanter in fide Catholica perſeuerare, nō
 ſine magna animi mei voluptate audio.
 Sed quòd ab ea defeciſſe, & in aliud ne-
 ſcio quod Euangelium tranſlatus eſſe
 dicitur filius eius, Illuſtriſſimus Domi-
 nus Archiepiſcopus Magdeburgenſis,
 ingentem ex eo dolorem accipio, neque
 poſſum tamen adhuc animum inducere,
 vt credā factum id ab eo fuiſſe. Quæ-
 ſo Illuſtritatem veſtram, velit ea de re
 me certiorē reddere, & apud quoscuq;
 Germaniæ Principes aliquid authorita-
 te valet, præcipuè verò apud aſſinē ſuum
 Illuſtriſſimū Dominū Marchionē Ele-
 ctorē, efficere conetur, vt ſuos huc Ora-
 tores primo quoq; tēpore mittat. Nam
 quod ipſa factura ſit hoc Illuſtritas ve-
 ſtra, omni prorsus cunctatione ſemota,
mihi quidem dubium non eſt. Præclare

EPIST. CARD. HOSII
merebitur de matre sua Ecclesia, si quā
plurimos in eandem voluntatem impu-
lerit, & cū apud homines laudem, tum
apud Deum ingentem ex eo gratiam
cōsequetur. Qui vt Illustritatē vestram
pro Ecclesiæ suæ defensione quamdiu-
tissimè seruet incolumen & felicem, di-
uinam illius maiestatem supplex oro,
méque gratiæ illius commendo. Datum
Tridenti XXiiij. die Martij, Anno Do-
mini. M. D. LXII.

Illustritatis vestræ

Seruitor deditissimus,

Stanislaus, Card. Varmien.

*AD DECEM PROCERES,
Equitèſque Polonos, in Comitiiſ Varſa-
havienſibus congregatos, Epistoſa
Martini Cromeri.*



EM Virtute veſtra di-
gnam, & moribus ma-
iorum veſtrorum con-
ſentaneam facitis, Rex
inclyte, & vos Proce-
res Equitèſque Polo-
ni, quòd vobis religionē Dei opt. max.
cuius ope regnum hoc ſeptum barbaris
gentibus tam diù ſtat incolume, in pri-
mis curę eſſe oſtenditis. Qua in re quan-
tum extiterit ſemper ſtudio maiorum
veſtrorum dicerem, ſi vos ignorare exi-
ſtimarem. Ex eo quidem tempore, quo
ij Chriſto Ieſu Deo & ſervatori noſtro
populariter nomina dedere, eiùſque ſan-
ctiſſimas leges atque cæremonias à mul-
tis aliis populis longè antè ſuſceptas, &
eius ipſius numine per continuam mul-
torum ſeculorum ſucceſſionem ab ipſiſ
vſque Apoſtolorum temporibus con-
ſervatas, ſibi que ad extremum, cùm Deo

placuit, non tam scriptis, quàm viuis voci-
 bus quasi per manus traditas suscepère:
 ex eo inquam, tempore dimoueri se ab
 iis nunquàm passi sunt. Quarum alias
 quasdam gètes minùs tenaces fuisse non
 ignoramus. Quò verò cæteris quoque
 hominibus testatius facerèt illi ipsi ma-
 iores nostri, omnia pro retinèda ac defé-
 denda, quam semel suscepissent, religio-
 ne se facere & pati paratos esse, stringere
 ij gladios, quibus percingebantur, cum
 Euangelium, quæ lex Christi est, publi-
 cè in templis legi inciperet, soliti esse
 memorantur. Nec id signis & verbis
 profitebantur magis, quàm re præsta-
 bant. Vltrò enim & alacres arma sume-
 bant contra barbaras gentes, sicubi eas,
 quamuis longè à se, nomini Christiano
 graues & infestas imminère senserant.
 Itaque & cum Prussis atque Lithuanis
 & consanguineis suis Pomeranis olim,
 priusquàm eæ gentes Christo nomina
 dedère, multa gesserunt bella, non tam
 de imperio, quàm de religione: & re-
 gnâte apud se Vladislao Iagellone, cum
Vitoudo Lithuanorù duce in intimam

Tartariam expeditionem susceperūt. Et verò eodem Iagellone & filiis eius Vladislao & Cazimiro regnantibus, non modò in Valachiam, & ad Brailouiam Danubiúmque, verùm etiam in Thraciam vsque armati contra Turcas penetrarunt, vt Valachis, Rasciis, Bulgaris atque Græcis laborantibus subuenirēt. Quid igitur? An vos degenerastis ab hac virtute maiorum vestrorum? Minimè verò. Nam vt mittam recentiores quasdam expeditiones in Vngariã & Austriã, regnante nuper optimi & benignissimi huius regis patre diuo Sigismūdo à vobis eodem studio & voluntate susceptas, istud certè studium vestrum, quo sanctissima Christi instituta, infelici hac nostra atque etiam superiori ætate cupidorum & ambitiosorū hominū partim incuria, partim improbo studio vel contaminata, vel suppressa vindicare cupitis, (Neque enim cum iis sentio, qui vel odio, vel inuidia, vel ambitione cuiusquam, & potentiæ authoritatísque contentione hæc agi suspiciantur:) istud igitur studium vestrum eò maioris est pie-

tatis, quò magis pernicioſa ſunt religio-
nibus praua & impia dogmata, quã ar-
ma: propterea quòd hæc quidem corpus
modò petunt, in animum, in quo ſita eſt
religio, nihil iuris habet: illa verò rectas
de Deo, deque cultu ac cæremoniis eius
opiniones, quæ Reſpub. quoque ma-
ximè conſeruant, tollunt ex animis, &
pro iis barbaricam quandam feritatem
ingenerant: qua fit, vt relaxatis ſemel
audaciæ ac temeritatis habenis, ſibi quiſ-
que placeat, alterum non modo con-
temnat dånétque, verumetiam pro ini-
mico & hoſte ducat. Atque hinc exi-
ſtunt feralia inter homines diſſidia, quæ
florentiſſimas etiam Reſpub. peſſun-
dant penitus, & euertunt longè faci-
lius, quàm arma hoſtilia. Quod & plu-
ribus verbis, & non obſcuris exemplis
demonſtrari poſſet, niſi eſſet luce me-
ridiana clarius. Iam verò ſicut vtilius,
ita difficilius eſt radicataſ in animis mul-
torum opiniones, peſtilentes præſer-
tim, eradicare, quàm hoſtem non modò
ab alienis, verumetiam à ſuis finibus ar-
cère. Eſt igitur ſi non ſuperior, certè par

pietas ista vestra pietati maiorum vestrorum. Videte modò etiam atq; etiam, ne cui falso pietatis prætextu imponatur, neu quis pro vera religione, pestem religionis & Reipublicæ, superstitionē vel impietatem asserendam & vindicandam suscipiat. Quod quidem iudicium, tot ac tā diuersis & inter se pugnātib⁹ de religione opinionibus, longè est difficilimū. Fallit enim (vt rectè inquit sapiens quidam) vitiū specie, virtutis & vmbra, ita vt plurimi, cū ad religionis dogmata & instituta disceptanda ventū est, errare, non pauci scientes volentesque falsa pro veris affirmare, & ad augendas vel stabiliendas opes suas, tegendasue turpes cupiditates & flagitia sua sanctissimo religionis nomine apud imperitā multitudinem facile abuti possint. Vt enim natura omnium hominum quamuis ferorum & barbarorum mentibus quidam de diuino numine, eiusque cultu sensus insitus est, ita certam & absolutam eius cognitionem assequi ex se ipsa nequeunt. Idque intelligens Deus opt. max. ipse cēlitus certissimā sui no-

titiam cultúmque primùm quidem angelorum ministerio, vel secretiore quadam piorum & sibi charorum hominum inspiratione: deinde verò per filiũ suum sapientia, bonitate, & potestate sibi parem in vno ferè populo informavit: Ad extremum verò per discipulos eius, eorumque successores, non modò pietate & integritate vitæ conspicuos, verumetiam mirabilium, & vires humanas excedētium operum patratores per omnes gentes atque ætates, totúmque orbem terrarum, nequicquã aduersantibus impijs dæmonibus, mirabiliter eam diffudit & propagavit. Et sedulò quidẽ conati sunt invidi dæmones cũ ipsi per se, tum per satellites & ministros suos tyrānos errorúmque magistros, vel delẽre penitẽs ex animis hominum illã ipsam notitiã cultúmque Dei, vel deprauare: sæpẽque ij conatus permissu & arcano quodã concilio Dei nõnullũ successum habuẽre. Nam & ipse Satanã, transformãs se in Angelũ lucis, vt inquit D. Paulus, sæpẽ multos in impias & absurdas de Deo opiniones induxit, vel cultum eius

ad se traduxit, nefandisue retibus & cæ-
 remonijs polluit, & ministri eius falsi
 Prophetæ, & magistri mēdaces sub spe-
 cie ministrorum iustitiæ & veritatis fal-
 lentes, multos seduxerunt, partim dero-
 gando fidem veræ ac diuinitus proditæ
 doctrinæ: partim nouis ac domi suæ na-
 tis interpretationibus eam deprauando,
 & sua demonumue commēta pro ipsi-
 simo Dei verbo venditando. Itaque &
 in Hēbreo populo fuerunt olim, qui di-
 cerent: Hæc dicit Dominus, cū ille eos
 non mitteret, & in Christiano ipsa, quæ
 mentiri non potest, Veritas prædixit,
 multos in suo nomine venturos esse, di-
 cturósque: Ego iū Christus: aut, Ecce
 hīc, vel illic est Christus: & multos ab eis
 seductum iri. Quod quidē re ipsa etiam
 impletū esse nemini dubiū est. Iam inde
 enim à temporibus Apostolorum fuēre
 inter Christianos Hymæneus, Alexan-
 der, Menander, Ebion, Cherintus, ac de-
 inde alij post alios magistri mendaces,
 segregantes semetipsos, introducentes
 sectas perditionis, & speciem quidem
 pietatis habentes, virtutem autem eius

*Ezech. 13.**Matth. 24.**Marc. 13.*

abnegantes. Ne modò quidem defunt
cùm alibi, tum apud nos eiusmodi pe-
stes habéntque suos satellites tyránicos,
homines mente corruptos, qui ceteros
minis, mulctis, ac supplicijs vel inuitos à
vera pietate in erroré secum abstrahunt,
nonnulli quidem arbitrâtes obsequium
se præstare Deo, complures verò idem
duntaxat simulantes, sed suum interim
negotium agentes veriùs, quam Dei.
Quod quidē non tenui quadam coniec-
tura, sed ipsa rei euidencia probari po-
test. Sed ego ita nunc agam, vt quasi in
re dubia à qua parte stet veritas & pietas
suum cuique de omnibus iudicium sal-
uum relinquam. Certè non idem omnes
nunc sentiunt de doctrina, institutis &
ritibus religionis. Non conuenit, vt sci-
tis, multis magnisque de rebus inter eos
qui se Euangelicos vocant, & qui Papi-
stæ appellantur. Inter eos autem, qui
volūt esse medijs, & ipsi ab vtrisque dis-
sentiunt, & in vtrisque multa damnant.
Quid verò isti ipsi Euangelici, quemad-
modum videri volunt, verbi Dei siue il-
lustratores, siue vindices? Idémne om-

nes sentiunt? Minimè gentium. Alioqui unde quæso nata sunt nobis tam diuersa nomina, quibus illi inter se distinguuntur, vt alij quidè dici velint Protestantes vel Angustanæ confessionis, alij Tigurinæ, siue Geneuensis, quos etiam Zuinglianos & Calvinianos & Sacramentarios appellant: alij Picardi, Anabaptistæ alij vocitètur? Vnde autem est, quòd quidam quasi fastidientes iam hæc vulgaria, partim Osiandri, partim Serueti doctrina & nomine gloriantur? Mitto Russos, siue Bulgaros, & Boëmos Calixtinos: qui quàm valdè dissentiant ab ijs, quos iam enumeraui, non dico modò, certè ipsi sese ab omnibus segregant, & penes se solos veram & incorruptam religionem vegere contendunt: à cæteris autem ferè improbantur. Sunt & alij prætereà, nisi fallor, neque cum superioribus, neque inter se ipsi de rebus non parui momenti consentientes, sed nobis adhuc minus cogniti. Et omnes quidem hi verbo Dei se niti præ se ferunt & asseuerant, sed non eodem id modo omnes intelligunt, aut interpretantur:

EPISTOLA

Verùm sua quisque vel à se excogitata; vel vndelibet arrepta opinione impensius delectatus, alterius sensum vix, ac ne vix quidem fortasse cognitum, non tam superciliosè quàm hostiliter damnat. Atque hinc sanè existunt vulgò neglectus & profanationes cultus diuini, cum diuini nominis contumelia coniunctæ, exultantibus & insultantibus nobis atque religioni Christianæ, quasi falsæ vel incertæ duntaxat, Iudæis & Mahometanis. Hinc offensiones mutue & irritationes animorum, non solùm inter ciues, & eiusdem linguæ eiusdemque iuris homines, verumetiam inter cognatos & necessarios, citò in extremum florentissimi huius regni exitum, quod ipsi vos non obscurè cernitis, erupturæ, nisi celeriter Deus opt. max. & tua, Rex clemētissimè, ac vestra pariter Proceres Equitesque sapientia salutarem opem attulerit. Quid igitur factò opus est? Vos quidem id rectè sapienti consilio vestro expedietis: dicam tamen & ego quod sentio: & dicam verè, & ex animo, pro mea in communem

patriam fide & officio: vos quę so benig-
 gnę ac diligenter attendite. Si de legibus
 & institutis Reipub. vestrę hęc esset
 controuersia, rationibus & argumentis
 non cuiuslibet, sed iis modò, qui in hac
 Repub. multum diuque versati sunt, in-
 ter ipsos contendendum ac disceptan-
 dum esse censerem authore Platone cla-
 rissimo philosopho, quę nam esset re-
 cta, & moribus maiorum virorum con-
 sentanea, & vobis, liberis posterisque
 vestris ac toti Reip. salutaris sententia:
 eamque cum vestris omnium iudiciis &
 assensu publico esset comprobata, gra-
 uibus poenis à vobis sancendam esse iu-
 dicarem. Quòd si quis communi placito
 vestro temerè aduersaretur, intelligitis
 opinor, quę ibi vestrę, quę magistra-
 tuū essent partes. Quin si ego, aut quis-
 piam alius videri vellet indulgentior,
 meritò metuere deberet, ne laxanda dis-
 ciplina publica ad perniciem Reipub.
 hoc eius consilium spectare aliquatenus
 existimaretur, néue pro populari prę-
 uaricator, pro leni legum patrięque ho-
 stis iudicaretur. Quamobrem quia pe-

nes vos est omne legum & institutorum
ad hanc Rempub. pertinentium arbitrium, vos quæ huic regno vtilia & salutaria esse iudicatis, prouidere, in commune consulere & statuere conuenit: me meique similes non modò priuatos homines, verumetiam magistratus publicos, capeffere iussu ac decreta vestra, non meo, priuatiue cuiusquam vel paucorum commodo & arbitrio mutare, aut indulgenter præterire decet, ne si publicè quidem vtile id fore videretur: propterea quòd nunquàm tātum boni Reipublicæ conciliari potest vnus alicuius paucorumue salute, quantum conflatur mali, si principis & populi maiestas iminuat, legumque authoritas ac disciplina publica labefactetur & clanguescat. Etenim vtilitas indulgentiæ etiam si in plures redundet, ad vnum quidem tempus pertinet, exemplum verò præuaricationis non modò ad multos homines, sed ad omnes leges, & omne tempus. Itaque de Zaleuco, Lycurgo, L. Bruto, Mâlio Torpuato, & alijs quibusdã Græcis, Latinis atque barbaris legumlatoribus,

aut alioqui principibus & sapientibus viris cum sempiterna eorum laude memoratur, quòd ij disciplinam publicam partim charissimorum liberorum suorum cēdibus, partim etiam mēbrorum suorum mutilatione exilióque suo sanxerunt, pluris facientes stabilitum legum quo Rerumipu. salus continetur, quàm ea, quæ mortales in hac vita ducūt charissima. Sed quorsum hæc tam longè repetita? Népe vt intelligatis, quod tamen per vos ipsi probè intelligitis, quæ vestræ omnium, quæuē priuati alicuius vel paucorum essent partes, si de ijs rebus esset controuersia, quæ peculiariter ad rempublicā vestram pertinent. Quid igitur, cū de religione cuiusque ritibus ac cæremonijs disceptatur, idémne existimandum est? E quidē si his de rebus, sicut de illis superioribus, placita vniuscuiusque populi propria esse debere; aut omninò posse arbitrari, idem de his, quod de illis, vobis faciendum esse censerem. Sed alia longè est religionis, alia Reipub. ratio. Hæc sua est cuique genti, illa multis, atque ad eò toti terratū orbi

EPISTOLA

communis. Illa ab hominibus constituitur, hominúmque iudicio diuersis pro ratione temporum legibus & institutis temperatur: hæc verò diuinitùs constituta certas habet leges & immobiles, quas nulli neque homini, neq; populo, ac ne omnibus quidem simul abrogare, antiquare aut mutare licet. Quod si quis conetur modò, meritò impius & sacrilegus habeatur. An nò faciunt hoc igitur Pontifices & Episcopi, dicet aliquis? Negant illi, tu ais. Quis igitur còtrouerfiam hãc dirimet? Verbum Dei, inquires. Recte sane. Vnde autem id petes? Cœlitùs? At procul cœlum abest. Reuelationem ostéde si potes, verùm ita, vt nobis certum sit, eam diuinam esse. Ab authore Christo? At is iam pridem inter mortales loqui desijt. E scriptis propheticiis, Euangelicis, & Apostolicis? Nò male, quamuis non è solis fortasse, sed mitto id modò. Cæterùm scriptorum illorum genuinus sensus & interpretatio, de qua est omnis fere controuerfia, penes quem erit? Non penes Episcopos quidẽ, inquires. Cur, obsecro, magis penes te, tuíque

tuīq; similes? At penes hos oēs. Vnde id probas? Videris habere aliquid è sacris scripturis. Sed in easdem salebras nostra relabetur sermocinatio. Negabo enim ego eū esse, quē tu vis, illarū scripturarū sensum. Negas tu vicissim vllam esse in sensu earum percipiendo difficultatem. Cur igitur non conuenit inter nos? Cur non olim inter Arium & Athanasium, Eunomium & Basilium, Iouinianum & Hieronymum, Donatistas & Augustinum? Cur autem scribit Petrus de Pauli epistolis, quòd in ijs sunt quædam difficilia intellectu, quæ indocti & instabiles deprauant, sicut & ceteras scripturas, in suam ipsorum perditionem? Sed mitto disputatorem. Ad te Rex & vos Proceres, Equitēsque sapientissimi redeo. Nullæ ne igitur vestræ sunt partes in componendo religionis dissidio? Sunt profectò, & magnæ quidem. Sed tamen non arbitrandi & statuendi, quid sequi quemque oporteat, ac ne illud quidem, quæ sit de quaque re congruentior verbo Dei sententia. De quibus duobus illud quidem iam dixi, nec vos aliter exi-

stimatis, ne omnium quidem populorū,
 nedum vnius alicuius esse: hoc verò cu-
 iusnam sit, nondum dico. Sed vt sit vni-
 uersi coetus Christiani, quod quidā con-
 tendunt, vos certè, quamuis non viles
 animæ, vt quidam fortassis externi pu-
 tant, nec in angustissimo & obscurissi-
 mo angulo terræ positi, soli tamen Ger-
 manis, Vngaris, Boëmis, Gallis, Anglis,
 Scotis, Hispanis, Grecis, Armenis, Mos-
 chis, Indis, Æthiopibus, & fortassè mul-
 tis alijs nationibus & populis Christia-
 nis præiudicare in eo non potestis, vt vel
 hîc, vel in nationali, quod ita vocant,
 Concilio statuatis, hoc esse consentaneū
 verbo Dei, hoc non esse. Quota enim
 pars Christianorum nos Poloni sumus?
 Addam etiam Prussos, Lithuanos, Rus-
 sosque, si lubet. Alioqui iure illi populi,
 quos dudum enumeraui, vobiscum ex-
 postularent, sicut D. Paulus Apostolus
 cum Corinthijs: An à vobis verbū Dei
 processit, aut in vos solos peruenit?
 Taceo cæteram fratrum vestrorū Equi-
 tum honestissimorum, qui hinc absunt,
 multitudinem. Mitto mulieres, mitto

etiam opificum turbam, & omninò oppidanos & aratores & pastores vestros: qui licet nullam huius Reipub. partem capebant, cæterùm quod ad religionem attinet, sciunt in Christo Iesu non esse Iudæum, neque Græcum, non seruuum, neque liberum, non masculum, neque foeminam, sed omnes nos vnum esse. Nec vos ignoratis, stulta mundi elegisse Deum, vt confunderet sapientes: infirma, vt confunderet fortia: ignobilia & contemptibilia, & ea quæ non sunt, vt ea quæ sunt, destrueret. Ne his quidē igitur præiudicare hac in parte debetis, etiamsi possetis. Quod si facere pergitis, cur non itidem vestro exemplo Srodensis vel Prossouiensis, aut, si mauultis, totius Masouia generalis conuentus (quos honoris causa nomino) vobis vniuersis ac totius Regni comitiis in constituenda Republica præiudicet, legesque condant, quibus cuncti teneamini? aut à suis & vestris maioribus, quamlibet rudibus & rerum imperitis, vt isti nouatores dictitant, conditas arbitrato suo mutet vel interprete-

D ij

tur? Aut si numerum spectatis, cur non oppidani & agricolæ vestri ex vniuerso Regno coëuntes id ipsum faciant? Quales quidem fructus, proh dolor, istud, quod à nonnullis iactatur, Euangelium nostra memoria nō nusquam germinauit. An hīc satis est multos esse, & non imperitos legum & rerum humanarum, addo & nobiles, si desit publica & legitima authoritas? quam quidem vos neq; penes Senatum cum Rege, neque penes vniuersum maiorum vel minorum Polonorum conuentum, etiam cum Palatinis ac cæteris magistratibus, extra locum ac tempus comitiorum esse vultis. Cur autem non modò à terrestribus iudicijs, verum etiā à colloquijs ad te Rex & ad comitia fiunt prouocationes? Vt enim priuatos præteream, inter quos nō desunt iuris & iustitiæ consulti, an non habent iudices & Palatini, quique his assident magistratus leges & constitutiones Regni? an eas non legunt? an non intelligunt? An, obsecro, facilius est & cuilibet magis obuia rerum cœlestium, sacrórūque mysteriorum, quæ verbo

Dei continentur, ac mentium, nedum sensuum humanorum captum excedūt, intelligentia, quàm de iure villagiorum, vt verbis statuti vestri vtar, scultetorum, Golotarum, fugitiui cmetonis, ac cæterarum omnium legum vestrarum cognitio? aut magis cuiusquam refert in his, quàm in illis falli & errare? At id quidē vel lippis, quod aiunt, ac tonsoribus notum est, hic exiguū quiddam agelli vel fortunarum, vel iuris personalis, vel denique vitam hanc fluxam & momentaneam, illic animarum æternam salutem & beatitudinem periclitari: hæc nō tam cogitatione, quàm sensu cuiusvis percipi, illa si humana aut angelica mente cōprehendi potuissent, non fuisse necesse Deum hominis naturam assumere, doctoremque veræ iustitiæ, quæ religione cultūque Dei maximè continetur, nobis fieri. Ac nihil ille quidem vsquam scriptum reliquit: verbis modò enarrauit, quæ voluit, idque partim promiscuæ multitudini, partim delectis à se Apostolis: quibus ait solis datum esse nosse mysteria regni Dei. Et tamē nec ij omnia

Luc. 8.

Luc. 18.

*Luc. 14.**2. Petri 1.**Ioan. 14.**1. Cor. 7.**1. Cor. 14.**5 Gal..*

(ne dicā nihil quod certè alicubi Euan-
gelista quidam dicere non veretur) tunc
intellexerunt, donec ipsemet eis aperuit
sensum, ac Spiritu sancto eos impleuit.
Quo magistro illi demum & intellexe-
runt omnia, & ceteris hominibus partim
viua voce, partim literis prodiderunt.
Sed ita vtrumque fecerunt, vt ad eorum
dicta, scripta que penitus percipiēda co-
dem nihilominus interprete Spiritu san-
cto nobis quoque opus sit: nisi fortè non
dico vnus ex iis D. Petri scriptis, sed
cūmunis omniū illorū iuxtā ac nostrū
præceptoris verbis fidem non habemus.
At enim putamus, inquietis, quòd & nos
spiritū Dei habeamus. Sit ita sanè: Verū
is, cūm & ipse sit Deus, non est dissen-
sionis, sed pacis Deus. Contemnere au-
tem aliorum iudicia, in re præsertim cō-
muni, & ad omnes ex æquo pertinente,
non pacis est, verūm dissensionis: quæ
ex Deo non est, sed ex Diabolo, & in-
ter opera carnis, quorum author & effe-
ctor est diabolus, à D. Paulo nomina-
tur. Quid autem fiet, si iisdem de rebus
diuersum à vobis apud se statuunt vici-

ni vestri Germani? quod quidem non semel his paucis annis fecerunt, cum à vobis & ab aliis populis, tum à se ipsi diuersa statuentes. Quid si Galli aut Hispani idem faciant? Quid si vniuersi Christiani populi? Scilicet præponderabunt vestra omnium illorum iudiciis, aut desinet esse verbum D E I, quod vobis fuit antea. Verum enimvero, inquiunt quidam, non erit hæc nobis cum quoquam causa dissidij. Nam si quid ab vniuerso Christianorum coetu in commune statuetur postea, illud sequemur potius, repudiata priore nostra sententia: interim autem dum id fit, suo quisque, nos etiam nostro sensu abundemus, & aliquid hominum desiderijs indulgeamus, quò eos in cæteris concordēs in officio contineamus. Præclare verò & sapienter. At quàm multa fuerint hac vna in re peccata? Primū omniū (ignoscite quæso in liberā Repub. liberè in medium consulenti) arrogantia, ne dicam temeritas, in statuendo iis de rebus, quæ si non alieni, certè non solius vestri officij sunt, & iam pridem maturo longè

plurimum iudicio constitutæ sunt, & non vestro tantum, aut vnius alicuius & alterius populi, sed multorum, ne dicam omnium, publico & longo usu approbata. Deinde vel pertinacia in retinendo contra sententiam aliarum gentium, vel certè leuitas in mutando, quod semel placuerit. Postremo frustratio eius, quem præ vobis fertis, euentus consilij vestri, atque adeò longè diuersus & contrarius exitus: Quæ enim beneuolentia aut concordia potest esse inter eos, qui non de leui aliquare, sed de maximis, quamuis liberè & sine vllò metu, dissentire se arbitratur? Religio est enim, quæ animos hominum non solum cum Deo, sed inter ipsos etiam imprimis consociat & religat. Quæ vbi non eadem est, dissociat eam maximè dissidentium voluntates & studia, tantum abest, vt cōsociet. Possem hinc disertus esse, si illustrare hoc exemplis cum veteribus, tum recentioribus vellem. Demonstrare sanè ex huiusmodi dissentionibus, non dico de summa religionis, verum de vno aliquo aut altero eius capite, nec eo quidē gra-

uissimo aut euidentiſſimo, pernicioſa diſſidia & capitalia odia cū inter diuerſas gentes, tum inter eiufdem linguæ, Reipub. ciuitatis, familiæ, domūque: homines ſæpè extitiſſe, & vix multo ſanguine, multorūque, ne dicam vniuerſorū, interitu reſtinctæ eſſe. Commemorarem ea tempora, quibus furor Arianorum in Ægypto & Oriente, Manichæorum atque Donatiſtarum in Africa, Monothelitarum & Iconomachorum in Græcia, Nouatianorum iſdem & aliis in locis, Ruſticorum nuper authoribus Luthero, Munzero, Carolſtadio & Zuinglio, in Germania graſſatus eſt. Adderem de Ruſſis non nihil. Sed non eſt neceſſe diutiùs his immorari. Nolite autem putare ſtatim ſedaturos vos eſſe inquieta ingenia, ſi quid eis paululum conceſſeritis aut indulſeritis; accendetis magis: nec ea modò, quæ iam tumultuantur, ſed quæ adhuc quieſcunt etiam: nec modò vt quæ iam concupierunt obtineant, ſed quæ præterea videbuntur, quoties libebit, ſi non impetrabunt, vt frutrà aduerſanti-

EPISTOLA

bus vobis extorqueant. Quis enim statuet modum laxatæ semel licentiæ? Cur autem non contendant, aut cur non ipsi sibi sumant quicquid collibuerit, recenti exemplo inuitati, cum vos ipsis quædam nullo exemplo concesseritis? Quæ enim gens, quæ natio, Christiana duntaxat, recteque de religione sentiens, vnamquam sibi sumpsit dogmatum & rituum Ecclesiasticorum commutandorum arbitrium? Sumpsere quodam tempore nonnullæ infectæ prauis opinionibus, eodem siue prætextu, siue consilio, pacandorum videlicet animorum, componendarumque dissensionum inter homines. Nec tamen id sine Episcoporum authoritate, quàm in religionis negotio plurimum valere intelligebant, nec isti Euangelici hodiè diffitentur. Quale fuit, cum propter ὁμολοσίαν, hoc est consubstantialiale, sicut verterunt Latini theologi, totus ferè tumultuaretur orbis terrarum, malebant nonnulli principes & populi authoribus Episcopis pro homousio homœousion, hoc est, æquisubstantialiale, vt ita dicam, contentiosis ho-

minibus concedere, quàm de vno, (vt videbatur) verbo non magis verbis quàm armis digladiari: Aut cum Boëmi Hufſo incentore efferati, diuina & humana omnia ſurſum ac deorſum miſcerent, uſurparunt ii quidem vulgò, adſtipulante Rochefana Pſeudarchiepiſcopo ſuo, ſacrum calicem, quod inuſitatum fuerat ſuperioribus aliquot ſeculis, & indulſerunt eis, qui Baſileæ ad Concilium congregati erant Epiſcopi, cum Boëmi in eo acquieturi, in cæteriſque concordēs & in officio futuri eſſe viderentur. Quid igitur? Conquieuerunt ne tunc ea indulgentia motus illi vel apud Boëmos, vel apud Græcos? Imò efferbuerunt magis, exultantibus nouatoribus, ſe aliquid quaſi iniuſtè à maioribus ſuppreſſum aut interuerſum, vi veritatis expreſſiſſe, & in cæteris etiam inſtitutis maiore deinceps confidentia damnantibus Eccleſiam Catholicam, quæ ſe ipſam in quibuſdam damnaffe videretur. Nam qui modus vel hæreſeôn, vel turbarum ac tumultuum poſteà fuit apud utroſque: Nónne Eunomiani, Aëriani,

EPISTOLA

Macedoniani, Luciferiani, Nestoriani, Graciam totumque Orientem postea miserè exercuere : Nónne Thaboritarum & Orphanorum, & Picardorum, & Adamitarum, & nescio quorum non móstrorum furor apud Boëmos postea magis exarsit, ita vt ne calicis quidē cōmunio quēquam ab eorum iniuriis, cædibus atque direptionibus, aut regnum ab ædium publicarum & sacrarum, arcium oppidorumque vastationibus & incendiis vindicaret? Hodieque Boëmi (de iis dico, qui se à veteris Ecclesiæ societate & institutis præciderunt) calicem quidem mordicè retinent; ceterum de præiudicatis opinionibus nihil remittunt, ac ne ea quidem præstant, quæ receperant; & quanquam suis ipsi viribus confecti, torpent magis quam quiescunt, non idem tamen omnes sentiunt: & qui dissident opinionibus, odiis quoque implacabilibus inter se nihilominus certant. Quid autem aliud nobis quoque expectandum est, si quid nouarum rerum cupidis indulgendum esse duxeritis? Quid autem eis indulgebitis? Calicē? At quàm

multi negāt eò sanguinem Christi contineri? quàm multi (horreo dicere) calicē dæmoniorum eum esse autumant, nōsque, qui verum ex eo Christi Dei & hominis sanguinē potari profitemur, non solum stultitiæ aut insanix, sed idololatriæ profus damnare non verentur? Sacra vernacula? At quàm multi sunt, qui hæc quoque contemnunt, imò execrantur, & id magis contendunt, vt nulla sint omninò sacra? Vxores sacerdotibus? At illi partim tollunt sacerdotium, sēque omnes vnà cum mulierculis & pueris ex æquo sacerdotes esse asseuerant: partim referre sua negāt, cœlibésne sint, an mariti sacerdotes? Ecquid Germani Principes cum Christianissimo Imperatore Carolo eiusdem modi indulgētia, quod Interim vulgò vocāt, in Germania profecerunt? Ecquid acceptarunt id, quibus dabatur? Ecquid in cæteris conqueuerunt? Cur autem si ista vos quibusdam indulgetis, non eodem exemplo Stancarianis etiam promiscua, quamuis leui de causa, diuortia, & noua, quoties collibuerit, prioribus solutis matrimonia,

Osiandrinis derogationem meriti sacro-
sancti sanguinis Christi, Calvinianis &
Sacramentariis sacramenti eius, quod est
omnium præcipuum & saluberrimum,
sanctissimi, inquam, corporis & sangui-
nis Christi profanationem. Seruetianis
maiestatis atque diuinitatis Christi filij
Dei & Spiritus sancti vel negationem
vel imminutionem, & neque vos, neque
maiores vestros, neque ullos prorsus po-
pulos, iam inde ab Apostolorum tem-
poribus Christianos fuisse, quibusdam
aliis incarnati, ut ita dicā, verbi Dei ne-
gationem, Picardis & Anabaptistis non
modò iterationem Baptismi, sed & om-
nium ciuiliū magistratuum sublatio-
nem, Lutheranis libertatem humani ar-
bitrii tollentibus, omnium scelerum im-
punitatem & legum solutionem: cur, in-
quam, his quoque hæc omnia, & si qua
præterea contendunt vel deinceps con-
tendent, pacis & concordie publicæ cō-
seruandæ causa non concedatis? Exhor-
ruistis horum commemoratione: nec ini-
uria profectò. Nam quæ maior impie-
tas, aut quæ præsentior pestis Rerumpu.

excogitari potuit? Et tamen nihil hîc fingo. Côtendunt hæc illi vt quæ maximè, & facilius est licentiæ principium, quàm exitum inuenire. Cur autem vos magis in his, quàm in calice, vxore sacerdotis, & sacris vernaculis religiosi sitis, & maiorum institutis receptisque antiquitûs moribus præiudicare vereamini? Certè his quoque dogmatibus, non minùs quam illis, authoritas verbi Dei prætexitur. Quàm verè, non dico modò: illud dico, Si vos huiusmodi controuersiarum disceptatores, & arbitros eorum institutorû, quæ ad religionem pertinent, semel constitueritis, non defuturos esse, qui ista quoque recta esse, & verbo Dei còsentanea subtiliter conclusis ratiunculis, adductisque ac detortis scripturæ sacre testimonijs, vel inuitis vobis extorqueant. Quod tunc ibi chaos, quæ esset Babylonica Reipub. vestræ facies, vestro, quod omen auertat Deus, & liberorum vestrorum sanguine expianda? An putatis, quæ plus triginta annis Germaniam tam miserè diuexans nefanda & impia & inter se pugnantis

EPISTOLA

dogmata, omnia simul extitisse? Erratis si ita existimatis. A reprehendendo abusu pontificiarum indulgentiarum orsus est Lutherus, cū eis pinguis illa offa permulgādarum earum præcepta esset. Non tollebat initio, imò asserēbat etiā receptum antiquitus numerum & virtutem sacramentorum, vsum & efficaciam sacrificij Christiani, merita bonorum operum, authoritatem Episcoporum & Pontificis maximi, purgatorium, curā & præces pro mortuis: Boëmos propter hæc sublata, & propter vulgatum vsum calicis reprehendebat: Vxores nō dabat sacerdotibus & monachis, quamvis impurum eorum cœlibatum exagitarēt. Quæ in scriptis eius deprehendere cuique licet. Aliquanto posterius cōtentione & aura populari elatus, non hæc modò, sed multa alia Ecclesiæ & Apostolorum, ne dicam Christi ipsius instituta labefactavit. Quæ ubi viderūt eum secundo populo facere Carolstadius, Munzerus & Zuinglius, maiora ausi studuerunt eum impietate superare, & sectatores eius pro religiosulis & Papisticæ

pistice hypocriseos vel superstitionis non exortibus damnarunt. Postea nullus fuit in ea natione, neque est etiam nunc impietatis, contentionum, tumultuum, bellorumque civilium modus & finis. Quid in Boemia superiori seculo? Statimne initio sese omnis effudit impietas, & portentosa illa sectarum varietas, quæ quamvis coercita postea legum severitate, adhuc tamen multis in locis cernitur? Modica fuerunt, & in speciem æqua & pia Hussi initia, ab indignitate quadam & odio sacerdotum indignorum nomine honoræque profecta. Non mutabat is sacrorum ritus, non dabat vxores sacerdotibus: ne calicem quidem unquam porrexit populo, qui nunc tanto perè expetitur. Posterius infinita illa malorum lerna, & multiceps hereseon hydra magno impetu cum summa rerum priuatarum atque publicarum perturbatione inuasit in Boemiam, eamque gentem aliquandiù miserè diuexauit. Quid igitur, inquiet aliquis? Damnâsne tu usum sacri calicis in populo? Ego verò neque sacerdotum coniugia, neque

EPISTOLA

sacra vernacula. Sed nego vestrum esse his de rebus statuere, maiorúmque instituta mutare. Cuiúsnam igitur: Diceré sacerdotum, nisi metuerem inuidiam, domóque allata quorundam preiudicia: Et magnos certè, atque vt ita dicam, irrefragabiles haberem sententiæ huius adstipulatores, vel authores potiùs, non modò Malachiã & Mosen, & alios prophetas Dei, verumetiam ipsum Dei filiũ & magistrum nostrũ Christum Iesum, cuiusque sententiæ peritos imprimis atque tenaces Apostolos, non vnum & alterum, sed simul vniuersos, perpetuũque superiorum omnium seculorum cõsensum, & si his adiungere fas est, istorum ipsorum, quos nunc novos veteris scilicet religionis magistros multi sequuntur, indubitata sententiam: qui & ipsi de sacrarum scripturarum sensu, totóque religionis negotio sacerdotum siue Episcoporum, quos ipsi ministros verbi vocant, proprium esse volunt iudicium. Sed mitto nunc sacerdotes. Si totius Ecclesię, id est, vt volunt quidam, certè non vnus alicuius duorúmve ordi

*Mala. 2.
Dent. 17.
Mat. 23.*

Act. 15.

num, sed omnium (quod ipsi quoque fateri videntur, necesse quidem habent, si ipsi sibi cōstare volunt) non ordinū modò, & sexuum, & ætatum, verumetiam populorū. At enim priusquàm omnes, qui Christianos censentur nomine, populi coëant, & has controuersias definiant, nos dissentionibus intestinis peribimus, inquiunt. Meliora quæso ominare. Itane amice ex tuo ingenio Deū metiris? Itane facilem & expeditam rationē subueniendi populo suo, quem precioso charissimi filij sui sanguine sibi acquisiuit, excogitare eum non potuisse, aut noluisse arbitraris? Quin ipse eius filius, ipsissima eius dextera & sapientia, omnibus diebus vsque ad consummationem seculi se cum suis fore promisit, ne quis modò ipse sese ab eo subtrahat. Subtrahit autem, quisquis pacem testamento eius relictam non seruat, rumpitque mutuā cum cæteris hominibus concordia & beneuolentiam, quod ille suorum symbolum esse voluit. Quis autem id facit? Iine, qui magistratibus à Deo constitutis obsecundant, & receptos à

Mat. 28.

Ioan. 14.
17.

EPISTOLA

Christianis maioribus suis multorūque populorum & seculorū consensu & vſu approbatos mores & instituta tuentur, an qui ea priuata authoritate, ne dicam temeritate sua conuellunt, & multa nouare student? Hi certè dicere de illis superioribus rectè non possunt illud, quod est apud Ioannem in Epistola: E nobis prodierunt. Illi verò de his non hoc solum, sed etiam quæ sequuntur: Sed non fuerunt è nobis. Nam si fuissent è nobis omnes, māsissent vtiq̃ue nobiscum. Certè his demum triginta vel quadraginta annis in Germania Lutherus, Zuinglius, Munzerus & quidam alii segregarunt sese, damnato antiquissimo Christiani orbis consensu, à quo prius non dissenserant. Vultis igitur redintegrare inter dissidentes concordiam? Nolite qualescunque (nihil enim nunc refert) sed veteres tamen dominos in gratiam, nolo dicere inuasorum, sed litigatorum seu petitorum de possessione depellere. Reponite potiùs per vim eiectos, aut retinentes adhuc possessionem defendite, vel tantisper duntaxat, dum de re tota ab

ijs, ad quorum iudicium ea spectat, legitime cognoscitur, si iusti & æqui amantes, si pacis & concordiae studiosi, ac non partium fautores videri vultis. Alioqui si cuiusquam istorum agrum aut villam violentior quispiam vindicare volet, nihil prohibebit, quò minus in eo quodcumque ipse ediderit foro, causa disceptetur, siue adeò amoto sine disceptatione iuris priore domino, concordiae retinendae causa ille alter in possessionem rei còtrouersae mittatur, ac tum demum eiectus per quauis fora de proprietate litigare iubeatur. At hîc statim isti vociferarentur, Indignum facinus, leges morésque violari: vel pereat mundus, dummodò fiat iustitia, coelumque terrae miscerent. Cur igitur magis æqui sunt in re sua quisque, quam in aliena? in propria, quàm in communi? in priuata, quàm in publica? & vt ne dicam in humana, quàm in diuina, certè in minoris momenti atque precii, quàm in ea, qua salus omnium & singulorum, & publica tranquillitas continetur? Cur autem tu, Rex sapientissime, vósque gra-

EPISTOLA

uissimi Senatores, & Equites honestissimi istorum contentione eò vos impelli patimini, vt iuris cum omnibus ordinibus & populis Christianis vobis communis disceptationem inter dissidentes, nullo more, nullo probato exemplo, nullo denique operaprecio soli vsurpetis? vel non cognita etiam causa, ipsos in alienam per multas gentes, multaque secula consentientis Ecclesiæ possessionem immittatis? Cur hîc non valent leges concordie charitatîsque Christianæ, si fortè indignum cuiquam videtur teneri legibus Conciliorum & Canonibus Ecclesiasticis? Cur non interdictum illud, quod valet in priuatis causis apud omnes gentes, quæ non prorsus expertes sunt humanitatis, *vti possidetis, ita possideatis*? Hæ vestræ sunt partes in componendo hoc religionis dissidio, hoc vestrû officium. Hîc, hîc vos, inquâ, Proceres & Equites vnà cum Rege mitissimo maiorum vestrorum virtutem & pietatem imitamini, eòsque nò adæquare modò, sed etiam superare contendite. Quid igitur ij fecerunt in simili causa?

Ante centum annos, cùm tumultuaretur sectarum & religionis dissidio Boëmia, sicut nunc tumultuatur Germania, multùmque opus haberent ac vterentur etiam Boëmorum armis & auxiliis maiores vestri cōtra vim & potentiam Teutonum Crucigerorum, regnum hoc & Lithuaniam diuexantium, cūnque multi nostrates nobiliores etiam & potentiores, eorum consuetudine (vt fit) deprauati, eadem dogmata profiterentur & propagare in hoc Regno conarentur, disputatūne est in comitiis de controuersis dogmatibus & ritibus? Nequaquam. Efflagitatūne nationale, quod vocant, concilium? Ne id quidem. Indultum ne quicquam nouarum rerum cupidis? Multò minùs. Imò ne Regnum quidem, ab illis ipsis Boëmis vltro oblatum, acceptum est, non aliam ob causam, quàm propter diuersam religionem, quamuis id non tam vtilitas publica suaderet, quàm necessitas propemodum exigeret. Imò etiam bellum eis denunciatum est, ni resipiscerent, & ad Ecclesiæ Catholicæ societatem redirent. Et

aduersus Boëmos quidem ita tunc se
 gessêre maiores vestri. Quid aduersus ci-
 ues & indigenas ? Leniores ne fuêre ?
 Imò verò conuentu instituto, & cunctis
 Regni ordinibus adhibitis, summo con-
 sensu obstrinxerunt ii suam quisque fi-
 dem & honorem : *Si quis indigena Regni
 huius, habens in ipso regno bona, hæreticales
 errores (agnoscite confœderationis ver-
 ba) facere aut promouere vellet. De quibus
 autem hæresibus & erroribus id intelli-
 gendum est ? Nempe de iis, qui tunc re-
 gnante Vladislao Iagellonis filio è Boë-
 mia importabantur. Præfatur enim lex:
 consideratis nonnullis disordinationibus, quæ
 in ipso regno Polonia suboriri cæperant. Con-
 stat autem ex historia illius temporis,
 nullas alias, nec aliunde tunc subortas
 fuisse, quàm à quibusdam non obscuris
 hominibus, Boëmica labe infectis. Ex-
 cluditne autem lex quempiam homi-
 nem aut ordinem vllò priuilegio ? Imò
 disertè addit: cuiuscunque status, gradus, con-
 ditionis, & præminentie fuerint: Adiungit
 etiam, siue spirituales, siue seculares. Quid
 igitur, si quis tale quid ausit ? Negant se*

ei auxilio, consilio, vel fauore patrociniari velle. Et hoc quidem (adduntque) etiamsi sanguine, affinitate, & quacunque propinquitate forent nobis aut alicui nostrum coniuncti. Sed prouehuntur etiam longius: nec pro eis loqui volumus aliquod verbum, inquiunt. Ac ne hoc quidem satis est. Sed, in eorum destructionem consurgere, eosque & quemlibet talem punire se velle promittunt absque dolo & fraude. O pietatem illius temporis! ô disciplinam! ô consensum & constantiam maiorum vestrorum Proceres & Equites. Addam etiam, ô sapientiam. Intelligebant illi fundamentum esse rerum publicarum religionem, qua non dico euerfa aut mutata, sed labefactata duntaxat aut in dubium reuocata, concidere illas, necesse esset. Itaque nullo respectu priuatarum necessitudinum, nullo metu vel potentiae cuiusquam vel dissidiorum, grauissimis poenis, & suis ipsi fide & honore, (quibus homini ingenuo nihil est

malebant, quàm indulgentia sua alere. Quid igitur? Eadémne nunc à vobis seueritas exigitur? Non peccaret, opinor, si quis diceret: Moribus antiquis stat res Polona, virisque, vósque ad maiorum vestrorum leges & instituta seruanda hortaretur, quorum vos per quam obseruantes esse subinde in alijs longè leuioribus causis ostenditis. Et causa quidem iustior etiam est vobis conseruandi ac defendendi placita maiorum vestrorum, tantò consensu ac diligentia sancita, quàm illis sancienti fuit, indulgendi verò iustior illis fuit. Neque enim tantam impietatem tulêre illa tempora, ad quantam nunc prouehuntur nonnulli, ita vt non multum à Iudaica ac Turcica abesse videantur. Sed fuerit illa seueritas illorum temporum, & priscæ grauitatis, aut si quis mauult simplicitatis. Non omnia omnibus temporibus, locis, hominibúsq; conueniunt. Sint sanè núc iniquiora tépora, quàm tunc fuêre, cùm non modò domi nobiles & factiosi homines turbas ciebant, sed foris etiã Germania penè omnis à crucigeris Prus-

sensibus concitata grauis huic regno
 imminebat, Boëmiq; vel indulgēdo ad
 societate belli inuitādi, vel aduersando
 irritādi maioribus vestris erāt. Habebāt
 illi tunc arma in manibus, valebāt viri-
 bus, reique militaris peritia, grauitē Si-
 lesios, Morauos, Austrios, Bauaros, Tu-
 ringos & Saxones vicinos, atque etiam
 Vngaros infestabant, & in finibus ferē
 huius regni castra habebant. Sed maior
 sanē habeatur huius temporis nostri ra-
 tio, quā illius tunc habenda fuit. In-
 dulgeatur & hīc, vt in multis, hominum
 licentiæ, vel, si mauultis, alicuius ordinis
 libertati atque prærogatiuis, quas tamen
 non intelligo quomodo à legibus sepa-
 rari possimus. Remittatur aliquid de se-
 ueritate legis illius, non Regia vel vnus
 alicuius ordinis constitutione, sed om-
 nium confœderatione conditæ, & fide
 ac honore omnium sancitæ, dummodò
 ne penitus ea laxatis licentiæ frānis an-
 tiquetur, aut contraria lege abrogetur.

EPISTOLA

dum relinquam. Ego Deum huius Regni protectorem & conseruatorem precabor, vt eam vobis mentem inspiret, qua consilia vestra primum ad ipsius laudem & gloriam, deinde ad Regni huius & Reip. salutem, postremò cum ad ordinis Equestris amplitudinē, tum ad omnium incolumitatem & mutuam inter ipsos atque etiam cum cæteris Christianis populis & nationibus concordiam vel stabiliendam, vel redintegrandam dirigantur. Quod si fiet, tunc demum vobis, liberisq; & posteris vestris rectè consuletis, & non modò veræ & constantis pietatis ac sapientiæ, verum etiam seruatæ patriæ laudem ac decus immortale apud omnes gentes vobis comparabitis, & ad lógam posteritatem transmittetis. Sin aliter vobis videbitur, ferédum fortasse nobis erit id quicquid erit: sed vos caute etiã atq; etiã primú, ne & domi pro concordia maiorem discordiam propagetis, & foris cæterarum Christianarum gétium volútes & studia, imò & auxilia, si quando res postularit, à vobis alienetis: deinde ne breui

quibus minimè speratis aut expectatis, colla subdatis, & qui nunc vestri ferè ordinis Episcopos atque sacerdotes, religionis cultúsque diuini quales quales moderatores, dedignamini, profligatissimorum nescio quorú Ziscarum, atque adeò ex infima fæce vulgi fabrorum, sutorum, & coriariorú arbitrio nò tantùm in religione, verumetiam in Repub. leges duras & intolerabiles vobis imponi sentiatís. Quod in Boëmia quoddã, & in Germania nuper, & aliàs alibi ex eiusmodi initiis & indulgètia, siue conniuentia magistratuum vsu venisse constat. Ad extremum, ne isthæc nouandi & mutandi dogmata & instituta Ecclesiastica licentia, sicut olim in Græcia, & vereor ne mox apud quosdam vicinos nostros, in barbaricam & Mahometicam impietatem, aut fœdam seruitutem desinat. Sed me terra dehiscat potiùs quàm aliquid eiusmodi vobis libe-





